

四庫全書

子部

欽定四庫全書

格致鏡原卷二十八

大學士陳元龍撰

舟車類一

舟

原始 晉書太陵星壯九星曰天船一曰舟星所以濟
不通 世本古者觀落葉因以為舟 淮南子古人見
窾木浮而知為舟 易繫辭伏羲氏剡木為舟剡木為
楫舟楫之利以濟不通蓋取諸渙 山海經番禺始為

舟世本共鼓貨狄作舟

共鼓貨狄黃帝二臣

墨子棄作舟

呂氏春秋虞姁作舟

物理論化狐為舟

東晉發蒙

記伯益作舟

拾遺記軒皇變乘桴以造舟楫

黃帝

內傳帝既斬蚩尤乃刳舟楫

物原遂人以匏濟水伏

羲氏始乘桴軒轅作舟楫

總論

劉熙釋名船循也循水而行也又曰舟言周流

也爾雅天子造舟諸侯維舟大夫方舟士特舟注連

四船曰維併兩船曰方單船曰特造舟者比船為橋即

今浮橋 禮月令 季春命舟師覆舟五覆五反乃告舟
備具于天子天子始乘舟注舟牧主乘舟之官五覆五
反所以詳視罅漏傾側之處也 談苑相船之法頭高
於身者謂之望路如是者凶雙板者凶隻板者吉隻板
謂五板七板雙板謂六板八板以船底板數之也 北
戶錄船神呼為孟公孟姥其來尚矣按梁簡文船神記
云船神名馮耳五行書云下船三拜三呼其名除百忌
又呼為孟公孟姥劉思真云玄冥為水官死為水神冥

孟聲相似又云孟公父名憤母名衣孟嬖父名板母名履或云冥父冥嬖因玄冥也 五行書河伯以庚辰日

死不可治船 漢書武帝自潯陽浮江而下舳舻千里

注舳後施柁處舻前頭刺櫂處也 淮南子龍舟鷁首

注鷁水鳥也畫其象著船首以禦水患 釋名船上施

屋曰廬施重室曰飛廬又其上施重屋曰雀室取其於

中候望若鳥雀之警視也 稗編舟之設屋開門而入

者其門謂之馬門必先闖首而後能入因其字義析而

稱之也 釋名舟中牀以薦物者曰苓言但有簣如苓
牀也南方人謂之苓寢言濕漏之水寢然從下過也

奚囊橘柚孫權命工人潘芳造船夜夢一老父謂曰船

將下水矣第楫檄

楫之入水處

宜更殺其角柁福

柁離水處曰福

宜

更殺其頓

福上曲處曰頓

則日行千里矣言畢化赤龍飛去如

法果然

晉史陶侃都督荆湘嘗造船竹頭皆令籍掌

之及桓溫伐蜀以竹頭作釘裝船 山海經崑崙有沙

棠木食其實不溺爲舟不沉 拾遺記玉山傍有丹桂

紫桂白桂皆直上百尋可為舟航謂之文桂之舟 酉
陽雜俎樟木江東人多取為船船有與蛟龍鬪者 五
侯鯖梓潭有梓樹葉廣丈餘垂柯數畝吳王伐作船使
童男女挽之船飛下男女皆溺死至今潭中有歌唱之
聲 偃曝談餘朝鮮酒巖有酒流出其下舟狀如亭上
覆重茆下布紋席棟梁棖桷丹青炳耀四面皆懸以素
幕 北夢瑣言唐乾符中綿竹王侁優者有巨力每遇
府中饗軍宴客先呈百戲王生腰背一船船中載十二

人舞河傳一曲畧無困乏 續聞見近錄諸網有厨船

諸船不動火惟厨船造飯以給諸船一無火燭之虞二

無盜米之弊 研北雜志 今人不善乘船謂之苦船苦

音庫 嵩山記東北五方山上有一池池中有破舟云

禹所乘來者 廣古今五行記濡湏口有大船船覆在

水中水小時便出見長老云是曹公船常有漁人夜宿

其旁以船繫之但聞竿笛絃歌之音又香氣非常漁人

始得眠夢人驅遣云勿近官妓傳云曹公載妓船覆于

此至今在焉 天中記烏山下無水魏末有人掘井五丈得一石函函中得一龜大如馬蹄積炭五枝于函傍復掘三丈遇磐石下有流水洶洶然遂鑿石穿水北流甚駛俄有一船觸石而匠人窺船上得一杉木板板刻字曰吳赤烏二年八月十日武昌王子義之船

名類 揚雄方言自關而西謂舟為船自關而東或謂之舟 說文舫方舟也 集韻鷁首天子舩也舩舩也舩海大船也 子虛賦榜人歌聲流唱注張揖曰榜船

也 廣雅吳曰𦨇 李虔通俗文晉曰𦨇音白 埤蒼海

中船曰艤音郎

說文江中舟曰𦨇音禮 方言東南

丹陽會稽之間謂𦨇為檣 釋名上下重板曰𦨇四方

施板以禦矢石其內如牢檻也狹而長曰𦨇衝以衝突

敵船也三百斛曰𦨇𦨇𦨇也短也江南所名短而廣安

不傾危也二百斛已下曰𦨇其形徑𦨇一人二人所乘

行也 輜軒絕代語江湖間大船曰𦨇小𦨇曰𦨇音小

𦨇曰𦨇小𦨇𦨇曰𦨇長而薄者曰𦨇音帶短而深者曰𦨇

音步小而深者曰艫音卯方舟謂之艫南州異物志外域

人名船曰艫大者長二十餘丈高去水三四丈望之如閣載六七百人物萬斛風土記小曰舟大曰船溫麻五會者永寧縣出豫章材合五板以為大船因以五會為名也晨鳧即青桐大船名諸葛恪所造鴨頭船也魏樟枿橈諸木皆以多曲理盤節為堅勁也漂汎者言船之在水如蓮花散落浮于川也通雅舩舫淺船也唐劉崇龜傳乘舩舫亡去荊州記湘洲七郡大舩皆

受萬斛 山堂肆考船有窓牖者曰舠艇楚辭乘舠艇
以上流 留青日札蚱蜢尖頭尾蟲生於草中今小艇
之形似之故曰蚱蜢 孫仲益尺牘未果造謁齋艦注
板屋舟也 輿服雜事其輕行則乘海舸合木船也又
云合木為槽 漢書注戈船越人於水中負人船又有
蛟龍之害故置戈于船上因以為名又大船上施樓曰
樓船 陳懋仁庶物異名疏越人謂船為須慮見越絕
葉隆遼志長白山其俗剝木為舟長可八尺形如梭

子曰梭船上施一槳止以捕魚至渡車則方舟或三舟
庶物異名疏劉楨魯都賦綠鷁蔥鷺俱船名以此鳥
形畫船首者也 白六帖 青雀舟名 事物紺珠海鵲
船頭低尾高前大後小左右置浮板如翅蜈蚣船底大
兩面平人立處臥板蔽捍兩旁架檣三四十嘉靖間造
王粲海賦茵桂之舟晨鳧之舸 越地傳競渡起於
越王勾踐今龍舟是也 荆楚歲時記按五月五日競
渡俗為屈原投汨羅日傷其死所故竝命舟楫以拯之

舸舟取其輕利謂之飛鳧一自以為水車一自以為水馬州將及土人悉臨水而觀之蓋越人以舟為車以楫為馬也 都城紀勝西湖舟船大小不等有一千料約長五十餘丈中可容百餘客五百料約長三二十丈可容三五十餘客皆雕欄畫棟行運如坐平地遊人賃假舟中所需器物畢備朝出登舟而飲暮則徑歸不勞餘力惟費錢耳西湖春中浙江秋中皆有龍舟爭標輕捷可觀清波雜志頃年西湖上好事者所置船舫隨大

小皆立佳名如汎星槎凌風舸雪篷烟艇扁額不一
溪蠻叢談蠻鄉最重重午不論生熟界出觀競渡三日
而歸既望復出謂之大十五船分五色阜船之神尤惡
去一必有風雨一月前衆船下水飲食男女不敢共處
弔屈原正楚俗也名爬船 中吳紀聞夜航船惟浙西
有之然其名舊矣古樂府有夜航船曲皮日休答陸天
隨詩云明朝有物充君信播酒三鉗寄夜航

古人船

蜀記夏禹欲造獨木船知梓童縣尼陳山有

梓木徑一丈二寸令匠者伐之樹神為童子不伏禹責
而伐之語林武王伐紂夜濟河月明如晝有大蜂狀
如丹鳥飛集王舟因以象畫旂翌日而梟紂名其船
曰蜂舟穆天子傳天子乘龍舟鳥舟浮于大沼注舟
以龍鳥為形制猶今吳之青雀舫事物紺珠蓮葉舟
齊景公造宮女駕之廣博物志夫差作天池造青龍
舟日與西施為水嬉任昉述異記魯班嘗刻木蘭為
舟詩家云木蘭舟出於此王子年拾遺記昭王時海

人乘霞舟以雕壺盛數斗龍膏以獻王 說苑莊辛爲
襄城君曰鄂君方汎舟于澌波乘青翰之舟 蜀王本
記蜀王有鸚鵡舟 拾遺記始皇時宛渠之民乘螺舟
而至舟形似螺沉行海底而水不浸入一名淪波舟
漢宮殿疏武帝作昆明池周匝四十里爲豫章大船可
載萬人船上起宮室 拾遺記帝乘衝瀾靈鷲之舟以
香金爲鈎霜絲爲綸丹鯉爲餌釣于臺下得白蛟焉
述異記武帝穿影娥池中有遊月船觸月船鴻毛船遠

見船載數百人或以青桂之枝為櫂或以木蘭之心為
檝練實之竹為篙紉石之脉為繩纜也 拾遺記漢武
帝思懷往者李夫人不可復得時始穿昆靈之池泛翔
禽之舟帝自造歌曲使女伶歌之 洞冥記昆靈池中
有凌波艦掖電艦 飛燕外傳婕妤接帝於太液池作
千人舟號合宮之舟 三輔黃圖成帝常以秋日與趙
飛燕戲于太液池以沙棠木為舟以雲母飾於鷁首一
名雲舟又刻大桐木為虬龍雕飾如真夾雲舟而行以

紫桂為柁柂及觀雲棹之玩擷菱蕖帝每憂輕蕩以驚飛燕命飲飛之士以金鎖纜雲舟于波上每輕風時至飛燕殆欲隨風入水帝以翠縷結飛燕之裾西京雜

記太液池中有鳴鶴舟容與舟清曠舟採菱舟越女舟

洞冥記昆明池中有撞雷舟西京雜記昆明池中

有弋檀舟三輔舊事昆明池三百三十二頃中有弋

船各數十樓船百艘船上建戈矛四角悉垂旛旌葆麾蓋照燭涯涘洞冥記虬泉池在五柞宮北中有追雲

舟起風舟待僊舟含烟舟 洞冥記 旦露池中有轉羽
舫凌波舫逐龍舫 吳志周瑜傳注江表傳劉先主之自
京還也權乘飛雲大船送之 馬縞中華古今注孫權
時號舸為赤龍小船為馳馬言如龍之飛於天如馬之
走陸地也 吳志太傅諸葛恪制為鴨頭船 吳志將
軍賀齊性奢綺所乘船雕刻丹鏤青蓋絳檐艤闔艤
望之若仙 王濬傳瓜皮船本圖以倉卒用之耳寧可
以深入敵境耶 義熙起居注盧循新作八槽艦九枚

起四層高十餘丈晉宮閣記天泉池有紫宮舟升進
舟曜陽舟飛龍舟射獵舟靈芝池有鳴鶴舟指南舟舍
利池有雲母舟無極舟都亭池有華泉舟常安舟蕭
方等三十國春秋盧修富冠京邑芙蓉艦千餘艘南
史祖冲之造千里船於新亭江試之日行百餘里南
史時天泉池新製鯢魚舟形狹而短梁武帝暇日常從
此舟泛之南史梁昭明乘雕文舸摘芙蓉梁書羊
侃傳侃初赴衡州於兩艫船起三間通梁水齋飾以珠

玉加之錦纈盛設幃屏陳列女樂乘潮解纜臨波置酒
緣塘傍水觀者填咽 梁史湘州賊陸納造青龍艦白
虎艦衣以牛皮高十五丈 隋志煬帝遣陸士澄往江
南採木造龍舟鳳舳 大業拾遺行次洛口御龍舟皇
后御翔螭舟又有小水殿九名浮景舟諸妃嬪所乘又
有大朱航三十六名漾綵船貴人美人及十六夫人所
乘又有朱鳥航二十四艘蒼螭航二十四艘白虎航二
十四艘玄武航二十四艘又有飛羽舫六十艘青鳬舸

十艘凌波舸十艘宮人習水者乘之餘人有五樓船五十二艘諸王公主及三品以下坐三樓船一百二十艘四品宮人及四道場玄壇僧尼道士坐二樓船二百五十艘五品以上及諸國蕃官乘板榻二百艘載羽儀服飾百官供奉之物黃蔑艘二千艇六品以下九品以上從官并及五品以上家口坐又有平乘五百艘青龍五百艘艨艟五百艘八檣舸二百艘蚱蜢舸二百艘竝十二衛所乘杜陽雜編隋處士元藏璣至海中滄洲去

中國數萬里藏璣思歸洲人製凌風舸送之激水如飛
旬日之間即抵東萊孔六帖劉宴為歌舡支江船二
千艘每船受十斛十船為綱每綱三百人篙工五十人
自揚州遣將部送至河陰上三門號上門填闕船米斗
減錢九十調巴蜀襄漢麻枲竹篠為綯挽舟北夢瑣
言唐天祐中成中令汭造巨艦一艘三年而成號曰和
州載艦上列廳宇泊司局有若衙府之制又有齊山截
海之名其餘華壯即可知也皮日休五賦詩序買釣

船一修二丈闊三尺施篷以蔽烟雨謂之五瀉舟以寄
魏君不琢以資雲水之興 稗編元豐元年春命安燾
陳陸二學士使高麗勅明州造萬斛船二隻仍賜號一
為凌虛致遠安濟神舟一為虛飛順濟神舟令御書院
勒字明州造牌 宋史米芾喜蓄書畫嘗發運江淮揭
牌行舸曰米家書畫船 金史張中孚制小舟不假膠
漆而首尾相鈎帶謂之鼓子卯 庶物異名疏元史王
思誠云糧船開洋之前遣將士乘海仙鶴入海庶幾糧

道寧息蓋巡哨船也 權衡庚申外史元順帝造龍舟
巧其機括能使龍尾鬣俱動而龍尾自撥水 陶宗儀
元氏掖庭記帝于內院造龍船首尾長一百二十尺廣
二十尺上有五殿龍身并殿宇俱五采金裝日於後宮
海子內遊戲船行則龍首尾眼爪皆動 陳繼儒筆記
楊鐵崖舫名春水宅

戰船 稗編墨子曰公輸般自魯之楚為舟戰之具謂
之鈞拒此戰舟之始也 太白陰經水戰之具始于伍

員製之以船為車以橈為馬 越絕書闔廬見子胥敢
問船運之備何如對曰船名大翼小翼突冒樓船橋船
令船軍之教比陵軍之法乃可用之大翼者當陵軍之
重車小翼者當陵軍之輕車突冒者當陵軍衝車樓船
者當陵軍之行樓車也橋船者當陵軍之輕足剽定騎
也 七命浮三翼注大翼一艘十丈中翼九丈六尺小
翼九丈 左傳吳伐楚戰于長岸大敗吳師獲其乘舟
餘皇以歸 蜀王本紀秦為太白船萬艘欲以攻楚

海物異名記越人水戰有舟名海鵲急流浴浪不溺

吳志呂蒙襲關侯至潯陽盡伏其精兵於艍艫中 晉

書武帝謀伐吳詔王濬修舟艦濬乃作大船連舫方百

二十步受二千餘人以木為城起樓櫓開四出門其上

皆得馳馬來往又畫鷁首怪獸以懼江神舟楫之盛自

古未有 晉書陶侃擊蜀賊王真真鈎得侃青雀船侃

入小舫得脫 晉令水戰有飛雲舟相去五十步倉隼

船相去四十步金船相去二十步小兒先登飛鳥船相

去五十步 南史宋西平將軍黃回軍至西陽乘三層
艦作羗胡伎泝流而進 南史王鎮惡率水軍自河入
渭橋所乘皆蒙衝小艦行船者悉在艦內泝渭而進艦
外不見有行船人北土素無舟楫莫不驚以為神 南
史王琳每戰勝艦則有聲如野豬其戰艦千數以野豬
為名 南史裴邃征邵陽州魏人為長橋斷淮以濟邃
密作沒突艦會而淮水暴漲乘艦徑造船側進擊大破
之北史陳將戚欣以青龍百餘艘屯兵守狼尾灘以

過軍路 詞林海錯 隋文帝詔曰陳國未盡藩節誠須
責罪與師若命水龍終當戰屈水龍謂戰船也 隋書
楊素在永安造大艦名曰五牙上起樓五層高百餘尺
左右前後置六拍竿竝高十尺容戰士八百人次曰黃
龍置兵百人自餘平乘舫艫等各有等差 卜大同備
倭記宋嘉祐三年知福州蔡襄奏福興泉漳各有魴魚
船乞修整以備海道又淳祐九年漳州守章大任造巨
鵬巨鰲二船荻蘆寨有巨舟曰赤馬 宋史洞庭湖賊

楊么四輪激水船行如飛 中興係年錄紹興二年王
彥恢制飛虎戰艦旁設四輪每輪八楫四八旋轉日行
千里 楊誠齋海鯨船賦序采石戰艦曰蒙衝曰海鯨
紹興辛巳海陵至江北掠民船欲濟虞允文伏舟于七
寶山後令曰旗舉即出伺其半渡卓旗于山人在舟中
踏車以行船但見船行而不見人敵以為紙船也舟中
忽發一霹靂礮遂壓敵舟人馬皆溺大敗之 楓憲小
牘余少從家大夫觀金明池水戰見船舫迴旋戈甲照

耀為之目動心駭比見錢塘水軍戈船飛虎迎弄江濤
出沒聚散欻忽如神令人汗下以為金明池事政如兒
戲耳至如韓蘄王鏐戰王天蕩飛輪八檣踏車槃回江
面者更不知何如也 白六帖青龍飛燕蒼鷹赤雀鐵
軸牙檣竝戰船名

附金船 瑞應圖王者德盛則金人下乘金船遊王後
池

銅船 交州記安定縣有越王銅船潮退則見又陰雨

日百姓樵採見銅船出水上拾遺記然丘之國貢獻使者汎沸海至京師以銅薄舟底蛟龍不得近

鐵船淮南子鐵可以為船華山記王玄仲登蓮花

峯頂見有池菡萏盛開又有破鐵舟存焉述異記滄州人久視山下有澄綠水其泉闊一百步投之金石終不沉沒州人以瓦鐵為船舫

石船臨海記白鵲山中有湖湖中有一石舫舩

竹船山海經衛丘之田有竹大可為舟注一節竹為

之

土船 世本廩君名務相姓巴氏與樊氏暉氏相氏鄭氏凡五姓皆爭事鬼神以土為船雕文畫之而浮於水內約船浮者當以為君他姓船不能浮獨廩君船浮因立以為君長

皮船 後漢書護羌校尉鄧訓令長史任尚縫革為船置於簞上以渡河掩擊迷唐 南史宋沈攸之等攻濃河造皮艦千乘 夷事畧嘉良之夷以皮為舟 太平

清話至正間吳漆工王氏以牛皮製一舟內外飾以漆解卸作數節載至上都遊漾灤河中各容二十人上都之人未嘗識舟觀者異之正字通明少保戚繼光濟水法用生牛馬皮竹木緣之如箱形火乾再用竿繫助之以浮水一皮船可乘一人兩皮船合縫可乘三人漆船續述征記石壺臺有敗赤漆船土民皆謂堯時物三秦記太虛山上有池神人嘗乘漆船於其內今有故漆船在焉

櫓漿

名物考觀魚翼而創櫓 物原顓頊作漿帝嚳作櫓

逸雅在旁曰櫓櫓檣也用檣力然後舟行也 洞冥記

漢宮含烟舟以木蘭文杏為櫓 隋遺錄帝幸江都每

舟擇妙麗長白女子千人執雕板鏤金檣號為殿脚女

逸雅在旁撥水曰櫓櫓濯也濯於水中也且言使舟

櫓進也又謂之札形似札也又謂之楫楫捷也撥水使

舟捷疾也 輜軒絕代語楫曰橈或曰櫓所以穩棹曰

漿漿搖櫓小掘也

留青日札櫓進船具縱曰櫓今之

三櫓船亦名三尾漿橫而後拽也古詩艇子打兩漿蘇詩急催艇子操三漿今長江曰棹漿船吾鄉有扳漿船

篙

附賤

劉熙逸雅所用斥旁岸曰交一人前一人還相交錯也物原顯頊作篙卓氏藻林莊子杖桴桴船篙也方將杖桴而引其船述異記漢武帝穿影娥池其船以練實之竹為篙世說陶公嘗發所在竹篙有一官長

連根取之仍當足注就連竹根用為簞以代鐵足 楊
慎談苑醖醐齊武帝乘龍舟以鍤石為簞足 俞益期
與韓豫章牋馬伏波昔開道簞跡鑿石猶存 荊州記
魚復縣瞿塘灘上有神廟先極靈驗刺史二千石經過
者皆不得鳴鼓角商旅恐觸石有石聲以布裹簞頭

𦉰 庶物異名疏唐王周誌峽船具詩序畧云岸石壁
立瀆之忽作篙力難制以其木之堅韌竿直戟其首以
竹納護之者謂之𦉰音洞竹為綫而勾其𦉰者謂之納為

船之良輔者舳與篙狀殊而用一也在船獨出悉不如舳云云按說文舳從同弋詩歸從同弋誤蓋舳為船板舳乃船左右大木音則一也

舵

物原帝嘗作舵逸雅其尾曰拖拖拖也後見拖曳也且弼正船使順流不使他戾也名物考視鴟尾而製拖潯陽記廬山之西嶺有甘泉魯見一舵從山頂流下後人號為舵下溪

帆檣

逸雅帆泛也隨風張幔曰帆使舟疾汎汎然也其前立柱曰檣檣巍也巍巍高貌也 廣雅張布障風曰帆

風土記帆從風之幔也施於船前各隨宜大小為制大者用布一百二十幅高九丈 物原夏禹作舵加以篷

破帆檣 事物紺珠帆懸桅受風禹效鱉制 譚苑醍

醐齊武帝數乘龍舟遊江中以絰越布為帆綠絲為帆

緯 白六帖隋煬帝以錦為帆 倦游錄劉濬白舫百

棹皆繡帆青簾多載妓女 吳時外國傳加那調州乘
大舶張七帆 異物志外域人隨舟大小或作四帆或
三帆前後皆施以取風氣而無高危之慮故行不避迅
風激浪安而能疾 南越志南海有盧頭木葉如甘蔗
織以為帆名曰篋 永嘉記郡有石如帆相傳云古有
神人以破石為帆故曰石帆

緯纜 附 鉤 統 柯 艇

物原堯作維牽 釋名引舟者曰筏筏作也作起也起

舟使動行也 纂文竹索謂之笮 南史朱超石傳宋
武北伐超石董舟師入河陽軍人緣河南牽百丈有漂
度北岸者注百丈以巨竹四破之大如人臂用麻索連
貫為牽舟具 演繁露杜詩舟行多用百丈問之蜀人
云水峻岸石又多廉稜若用索牽即遇石輒斷不耐故
劈竹為大瓣以麻索連貫其際以為牽具是名百丈百
丈以長言也 爾雅紼縹維之紼紼也縹縵也 邢昺疏
李巡云紼竹為索所以維持舟者郭璞云縵繫也孫炎

曰舟止繫之於樹木戾竹為大索然則紼訓為繫是
紼繡訓為綏綏又為繫正謂舟之止息以紼繫而維持
之也

鐵猫 焦竑俗書刊誤船上鐵猫曰錨或曰錨錨同即
今船首尾四角又用鐵索貫之投水中使船不動搖者
俗謂若茅 留青日札鐵十字即鐵錨所以碇船

紼 文選占五兩之動靜注以雞羽為之重五兩繫於
檣尾以候風 淮南子若紼之候風也注紼候風羽也

楚人謂之五兩

柯 顏師古漢書注牂柯係船杙也

艫 正字通舟泊岸去岸丈許置長板於船首與岸接以通往來俗呼艫板讀若跳

筏

稗編拾遺記曰軒皇變乘桴以造舟楫則是未為舟前第乘桴以濟矣筏即桴也蓋其事出自黃帝之前今竹木之筏謂之筏是也 爾雅庶人乘泝注并木以渡

方言汙謂之箨箨謂之筏 留青日札古者庶人乘柎
謂維木以為渡也即木牌後漢袁牢夷傳遣兵乘箨船
注箨音蒲佳反縛竹木為箨以當船也 晉史王濬傳
吳人於江磧要害處作鐵錐長丈餘暗置江中以逆拒
舟艦王濬作大筏數十方百餘步縛草為人被甲執斧
令善水者以筏先行遇鐵錐錐輒著筏而去

附
槎

拾遺記堯登位三十年有巨查浮於西海查上有光夜

明晝滅海人望其光乍大乍小若星月之出入矣查常
浮繞四海十二月一周天周而復始名曰貫月查亦謂
掛星槎羽人棲息其上羣仙含露以漱日月之光則如
暝矣 湘中記衡山白槎廟古老相傳昔有神槎皎然
白色禱之靈無不應晉孫盛臨郡不信鬼神乃伐之斧
下流血其夜波流神槎向上但聞鼓角之聲不知所止
詞林海錯橫槎江在廣西橫州縣晉咸元間有一枯
槎堅如鐵石橫於灘上其色黝然照人或曰天河所流

也洞天集嚴遵仙槎唐置之於麟德殿長五十餘尺
聲如銅鐵堅而不蠹李德裕截細枝尺餘刻為道像往
往飛去復來廣明已來失之槎亦飛去異苑趙牙行
舟於闔廬見水際有大槎人牽不動牙往舉得以之著
船船破變為龍浮水而逝

格致鏡原卷二十八

欽定四庫全書

子部
格致鏡原卷三十九

詳校官中書_臣羅錦森

侍讀_臣孫球覆勘

總校官中書_臣朱 鈐

校對官原任典簿_臣郭祚熾

謄錄舉人_臣查 浩

欽定四庫全書

格致鏡原卷二十九

大學士陳元龍撰

舟車類二

車

原始 淮南子聖人觀轉蓬而為車 釋名黃帝造車

故曰軒轅氏 路史軒轅氏作於空桑之北紹物開智

見轉風之蓬不已者於是作制乘車橫木為軒直木為

轅以尊太上 黃帝內傳帝既斬蚩尤因乘車輅又帝

令邑夷造車以便民 譙周古史考黃帝作車少昊時
畧加牛禹時奚仲駕馬 山海經番禺生奚仲奚仲生
吉光是始以木為車 呂氏春秋乘雅作駕寒哀作御
奚仲作車 世本黃帝之臣臣肱作服牛相土作駕馬
物原伏羲始乘牛馬而制羈縻鞭杖軒轅作輓輅少
昊制牛車奚仲制馬車而造鞍的勒勒駕六馬建旂旌
旆旒以別尊卑等級周公制進賢四望二車漢武帝作
羊車芝車 廣博物志王肅曰古者一轅之車夏后氏

駕馬謂之麗殷益以一駢謂之駟周人又益以一謂之駟後漢車服志上古聖人見轉蓬始知為輪輪行可載復謂之輿輿輪相乘流運罔極任重致遠天下享其利後世聖人觀於天見斗周旋魁方柄曲以攜龍角為帝車于是乃曲其輶乘牛駕馬

總論 禮斗威儀山車垂句山車者自然之車也句者曲也不揉治而自員曲故言垂句 孝經援神契德至山林則山出根車注根車應載養萬物也 宋書象車

者山之精也王者德澤流洽四境則出 孝經援神契

金車王者行仁德則出 瑞應圖舜時金車見帝庭

春秋歷命傳人皇駕六羽乘雲車 蜀記三皇乘祇車

出谷口 帝王世紀奇肱氏能為飛車從風遠行湯時

西風吹奇肱車至于豫州湯破其車不以示民十年東

風至湯復作車遣賜之去 周書王會成王時白州獻

比閭者其葉若羽伐其木以為車終日行 白澤圖故

車之精名曰寧野如輶車見之傷人目呼其名則無害

風俗通車一兩謂兩兩相與體也原其所以言兩者
箱裝及輪兩兩而耦故稱兩 劉熙釋名車古者曰車
聲如居言行所以居人也今曰車車舍也行者所處若
車舍也 周禮輿人為車圓者中規方者中矩立者中
縣衡者中水直者如生馬繼者如附焉注如生如木從
地生也如附如木之附枝也 周禮軫之方也以象地
也蓋之圓也以象天也輪輻三十以象日月也蓋弓二
十八以象星也 陳祥道禮書車之制前軾而後戶前

軌而後軫旁轆而首以較下軸而銜以轆對人者謂之
輦如舟者謂之輶揉而相迎者謂之牙輶之曲中謂之
前疾軾之上平謂之衡衡之材與衡之下木皆曰任以
其力任於此也轂之端與轆之下木皆曰軾以其旁止
於此也軾可以名輿可以名車達常可以名部軾前橫
木可以名輅此又因一材而通名也其為車也有長轂
有短轂有杼輪有倅輪有反揉有仄揉有兩輪有四輪
有有輻有無輻有曲輅有直輅有一輅有兩輅有直輿

有曲輿有廣箱有方箱有重較有單較者或駕馬或駕牛或輓以人或飾以物或漆或素皆因宜為制稱事為文然論其任重則同稱為車也 逸雅輶句也輶上句也衡橫也橫馬頸上也軼伏也在前人所伏也軼式也所伏以式敬者也乾鞞車中重薦也輕乾鞞小貂也輶埵也體堅埵也輶援也車之大援也枕橫在前如臥床之有枕也枕橫也橫在下也薦板在上如薦席也齊人謂車枕以前曰縮言局縮也堯典曰育御者坐中執御

育育然也較在箱上為辜較也立人象人立也或曰陽
門在前曰陽兩旁似門也梲梲也所以扼牛頭也馬曰
烏啄下向又馬頭似烏開口向下啄物時也輶罔也罔
羅周輪之外也關西曰輶言曲輶也或曰輶輶絲也絲
連其外也輪綸也言彌綸也周匝之言也輶言輻輳入
轂中也輿舉也軸抽也入轂中可抽出也釭空也其中
空也鐃間也間釭軸之間使不相摩也轄害也車之禁
害也輶裹也裹軹頭也軹指也如指而見于轂頭也筭

橫也在車前織竹作之孔筭筭蓋在上覆蓋人也垂藩也蔽水雨也輶蓋义也如屋構輶也杠公也衆义所公共也輶輶猶祕齧也在車軸上正輪之祕齧前却也鈎心從與心下鈎軸也縛在車下與輿相連縛也棠鐸也在車兩旁蹠幘使不得進却也幘憲也御熱也器物發揮輅大車輶小車輶輶車輶挽車輶輶臥車輶重載衣物車兵車一也有輶車輶車輶車之別喪車一也而有輶車輶車輶車之辨就車析而言之輪有輶輶亦曰

輶輪無輻者轂輪之心轂三十輻轂小穿曰軹所以
納輻也轂端鐵曰輶轆轂飾曰軹軸頭曰轆車脂轂曰
輶輶又其盛膏器礙車輪曰輶輿車之所以載者也車
闌曰軹橫軹曰轆車箱曰輶車轆曰輶車羽曰輶車耳
曰輶車前軹曰軹軹中軹軹前軹轆馬內轆繫軹前者
曰輶輶車橫木軹車後橫木輶車伏兔亦曰軹車輶輶
直輶輶縛曰輶輶端持衡木曰軹以縛軹輶端上曲
鈞衡曰軹車軹下曲者曰鈞軹輶皆車之跡綏上車索

造車自輿始察車又自輪始輪與其車之要歟 考工
記輪人為蓋上欲尊而宇欲卑則吐水疾而雷遠蓋已
崇則難為門也蓋已卑是蔽目也 左傳注兵車無蓋
尊者則邊人執笠依轂而立以禦寒暑名曰笠轂 漢
書黃霸字次公為潁川太守宣帝下詔賜車蓋特高一
丈別駕主簿車緹油屏泥於軾前以彰有德 急就篇
蓋輶俾倪柅索棠注俾倪持蓋之杠在軾中央環為之
所以止蓋弓之前却也 周禮藻車藻蔽鹿淺禋草飾

鄭注故書藻作輶杜子春輶讀為華藻之藻直謂華藻也玄謂藻水草蒼色以蒼土堊車以蒼繒為蔽也周禮孤乘夏篆卿乘夏縵注夏篆以五采畫輶約也夏縵畫以五色而無瑑也夏五色也染人云秋染夏縵無文漢書二千石車朱兩轡千石至六百石朱左轡注應劭曰車耳反出所以為之藩屏翳塵泥也輶以簞為之或用草師古曰據許慎李登說轡車之蔽也左氏傳云以轡載藥盈即是有鄣蔽之車也言車耳反出非矣

庶物異名疏 鄭箋幃裳童容也鄭司農云容謂檐車山東謂之裳韋或謂之童容以幃幃車之旁如裳以為容飾故或謂之幃裳或謂之童容其上有盖四旁垂而下謂之檐故雜記其幃有袂袂謂鼃脚邊緣是也然則童容與檐別司農云檐車者以有童容上必有檐故謂之檐車也此惟婦人車飾為然故士昏禮云婦車亦如之有檐是也 詞林海錯 屏篁蔽簷也一作屏星孔恂傳別駕車舊有屏星刺史欲去之恂曰別駕可去屏星不

可去儀制令諸車一品青油纁通幟朱裏朱絲絡網
三品以上青通幟朱裏五品以上青偏幟碧裏六品以
下皆不得用幟庶物異名疏重耳古重較也見古今
注文官青耳武官赤耳或曰重較在軍車藩上重起如
牛角故曰重較耳考工記疏較謂車輿兩相今人謂之
平鬲北堂書鈔徐野民輿服志云軾車前隱膝也案
魏都賦注云軾車橫覆膝人所憑者也演繁露古者
乘車皆立不坐車前橫木曰軾在車遇所敬則俯身以

手案式武王式箕子閭蓋如此惟安車乃始坐乘杜延年賜安車駟馬顏師古曰安車坐乘車是也博古圖輿輅飾弛曲作鵞頸形匾而方下而鍬可以植於欄楯上有螭紋而為斧刃狀然其兩旁皆以行虎飾之考其形制疑為伏軾所用之物庶物異名疏詩疏釋器云輿草前謂之艱後謂之茀李巡曰輿草前謂輿前以草為飾曰艱茀後戶也郭璞曰艱以韋韋韋車軾也茀以韋韋後戶也周禮輪人為輪斬三材必以其時三材既

具巧者和之轂也者以為利轉也輻也者以為直指也
牙也者以為固抱也注三材以為轂輻牙也轂用雜榆
輻用檀牙用檀 周禮輪人為輪行澤者欲杼行山者
欲侔杼以行澤則是刀以割塗也是故塗不附侔以行
山則是搏以行石也是故輪雖敝不甌于鑿注杼謂薄
其踐地者侔上下等搏圜厚也甌亦敝也輪厚則不敝
於鑿中 羣書考索轂者車輪之中外持輻內受軸者
也大車之轂一尺有半兵車之轂長三尺二寸故兵車

曰暢轂 考工記凡斬轂之道必矩其陰陽陽也者積理而堅陰也者疏理而柔是故以火養其陰而齊諸其陽則轂雖敝不斂 風俗通桑車榆轂聲聞數里俗說凡人揉桑作車又以榆為轂牢強朗徹聲響乃聞數里白六帖車轅之外輓牛曰牽傍 博古圖辟邪車輅托轅輿輅飾也作辟邪蹲伏之狀復飾以螭虺其園空可以容橫梁蓋所謂車之托轅也 博古圖古之車制行一車者有輶駕一輶者有梁服馬則出於梁下而兩

驂又所以佐服馬耳故輶一謂之承轅為銜梁之具作虎首侈口則口銜其梁也其上間錯金銀復飾以鸞鵲回舞之態固知昔人於輿服每有法度此特一轅之飾耳石崇奴券作車當取大良白槐之輻茱萸之輓

考工記輶人為輶輶有三度國馬之輶深四尺有七寸田馬之輶深四尺駕馬之輶深三尺有三寸軸有三理一者為美也二者以為久也三者以為利也凡揉輶欲其遜而無弧深世本衛公叔文子作蜺軸庶物異

名疏詩間關車之牽兮禮記輶以冒轂輶以制軸二者皆金為之牽車軸頭鐵也無事則脫行乃設之古者車不駕則脫其牽陳遵所投即是物也 山堂肆考天子

車為紫蓋故曰紫軼軼車輶也以玉飾之又謂之玉軼

升菴外集子夏易傳曰輶車下伏兔也今人謂之車

履形如伏兔以繩縛于軸故車下縛曰輶 庶物異名

疏詩云小戎伐收毛傳小戎兵車伐淺收軫也孔氏曰

軫者車之前後兩端之橫木也所以收斂所載故名收

馬兵車言淺軫者對大車平地任載之車為淺也 稗
編鑾者所謂和鑾也禮云行前朱雀謂朱鳥也鑾輅衡
上金爵者朱鳥口銜鈴故謂之鑾或謂為鸞字一而異
義也 博古圖蹲龍作龍狀而蹲之疑宮廟乘輿之飾
考其器則唐物也 禮記正義武車綏旌者武車草輅
也取其建戈及即曰兵車取其威猛即曰武車也德車
結旌者德車謂王金象木四路不用兵故曰德也 左
傳齊慶封獻車于季武子美澤可以鑑 薛靈公傳魏

文帝遣車十乘以迎靈共車皆鏤金為輪丹畫其轂軛
前有雜寶為龍鳳銜百子鈴鏘鏘和鳴響于林野事
物紺珠長簷車梁制也顏氏家訓云梁朝全盛時貴遊
子弟駕長簷車今時逍遙輜之飛簷即梁時之長簷車
也隋遺錄帝離都旬日幸宋何妥所進車車前隻輪
高廣䟽釘為刃後隻輪庫下以柔榆為之使滑勁不滯
使牛御焉

歷代車制通典黃帝作車至少昊始駕牛及陶唐氏

制彤車乘白馬則馬駕之初也有虞氏因彤車而制鸞
車夏后氏因鸞車而制鈎車奚仲為夏車正建其旂旒
尊卑上下各有等級商因鈎車而制大輅周因商輅以
制木輅約木以加飾 羣書考索漢書應劭曰古者諸
侯屬車九乘秦滅九國兼其車服于是屬車八十一乘
矣漢制因秦大駕八十一乘法駕三十六乘自高至文
車騎服御無所損益至武帝天漢中始定輿服之制郊
祀所乘謂之大駕又備車千乘騎萬疋舊制以金根車

為最尊比周之玉輅至後漢大駕則御鳳凰車以金根
為副東漢上原陵用大駕八十一乘祀天南郊則法駕
晉武帝始設金玉象草木五路竝為法駕東晉儉不中
禮副車惟設五乘宋則十二乘魏道武命禮官采古制
三駕鹵簿一曰大駕設五輅建太常屬車八十一乘法
駕屬車二十六乘小駕屬車十二乘十二乘起于宋王
宏之議而罷於隋大業之中唐制武德著令五輅屬車

十乘

指南黃帝作記里鼓劉裕白鸞隋鸞旂漢辟
惡秦皮軒漢耕根漢安車周四望齊羊車晉

貞觀

中始加黃鉞

晉制

豹尾

周制

二車通為十二乘高宗不喜乘

輅每大禮則御輦元宗以輦不中禮開元冬祀南郊乘輅禮畢騎還自是行幸郊祀皆騎于儀仗之內五輅腰輿皆陳于鹵簿而已羣書考索秦制大駕屬車八十

一乘法駕半之左右分行其車皆阜蓋赤裏木輻輳戈矛卷箴尚書御史所載最後一乘懸豹尾豹尾以前為省中北堂書鈔續漢書云漢承秦制為乘輿金根立車安車輪皆朱班重牙貳轂兩轄金簿繆龍為輿倚較

文虎伏軾龍首銜軛左右吉陽笏竊雀立衡櫺文畫軛
羽蓋華瑤建大旂十二旂畫日月升龍駕六馬象鑣鏤
錫金鍍方釳插翟尾朱縑樊纓赤罽易茸金就十有二
是為德車五時車安立亦皆如之各如方色馬亦如之
白馬者朱其髦尾為朱鬣云所御駕六餘皆駕四後從
為副車案方甫曰楚衛之間轅謂之輶徐廣曰繆交錯
之形也較在箱上說文曰櫺文畫蕃兵箱也通俗文曰
車箱為較蔡邕獨斷凡乘輿車皆羽蓋金華爪黃屋

左纛金鉞方釳繁纓重轂副牽黃屋者蓋以黃為裏也
左纛者以犂牛尾為之大如斗在最後左駢馬駿上金
鉞者馬冠也高廣各四寸如玉華形在馬駿前方釳者
鉞廣數寸在駿後有三孔插翟尾其中繁纓在馬膺前
如索帟者是也重轂者轂外復有一轂施牽其外乃復
設牽施銅金鉞形如緹亞飛鈴以緹油廣八寸長注地
左畫蒼龍右白虎繫軸頭今二千石亦然但無畫耳
獨斷前驅有九旂雲罕闔戟皮軒鑾旗車後有金鉞黃

鉞黃門鼓車古者諸侯貳車九乘秦滅九國兼其車服
故大駕屬車八十一乘也尚書御史乘之最後一車懸
豹尾以前皆皮軒虎皮為之也獨斷永安七年建金
根耕根諸御車皆一轅或四馬或六馬金根箱輪皆以
金鑄正黃兩臂前後刻金以作龍虎鳥龜形上但以青
縑為葢羽毛為後戶羣書考索東晉屬車五乘而已
加綠油幢朱絲絡青交路黃金塗五朱輪轂猶素兩箱
無金錦之飾其一車又是輅車舊儀天子所乘駕六元

興中屬車惟九乘苻堅敗又得偽車輦增為十二乘

通典東晉過江副車遺缺有事權以馬車代之建旗於上後制五色木牛象五時車立旗于背行則使人輿之牛取負重致遠而安旗常纏而不舒所謂德車結旌是也 羣書考索東晉則始建大輅戎輅宋孝武始建五輅後周置司輅之官掌公車之政皇帝之輅十有二等曰蒼輅曰青輅曰朱輅曰黃輅曰白輅曰玄輅曰玉輅曰碧輅曰金輅曰象輅曰草輅曰木輅唐因隋制玉金

象草木是為天子五輅 晉書皇太后皇后法駕乘重
翟羽蓋金根車駕青輅青幃裳雲旗畫轅黃金塗五采
蓋爪施金華駕三左右駢其廟見小駕則乘紫罽輅車
雲旗畫輅黃金塗五采駕三非法駕則皇太后乘輦皇
后乘畫輪車皇后先蠶乘油畫雲母安車駕六騊 騊
色油畫兩轅安車駕五騊馬為副又金薄石山輅紫絳
罽輅車皆駕三騊馬為副女旄頭十二人持榮戟二人
共載安車僮駕女尚輦十二人乘輜車僮駕女長御八

人乘安車僮駕三夫人油輶車駕兩馬左馼其貴人駕
節畫輶三夫人助蠶乘青交路安車駕三皆以紫絳罽
輶車九嬪世婦乘輶車駕三羣書考索漢景帝詔二
千石者車朱兩轡千石至六百石者朱左轡三百石以
上皐蓋二千石以上白蓋此景帝所定之制也通典謂
武帝天漢四年始定輿服之制令諸侯王大國朱輪特
虎居前左兜右鹿小國特熊居前麋皆居於左右此武
帝所定之制也然所乘之車其名不一皇孫乘綠車丞

相乘高蓋車三公皆乘使車列侯乘安車太守乘藩車
刺史乘傳車大夫乘官車使者追捕考按則乘小使車
佐吏則乘小車致仕者則或賜安車董巴輿服志諸
車之文乘輿倚龍伏虎靈文畫輶皇太子皇子諸侯倚
虎伏鹿靈文畫輶公侯倚虎伏熊黑輶朱班輪 晉書
中二千石二千石皆阜蓋朱兩輶銅五米駕二中二千
石以上右駢千石六百石朱左輶長六尺下屈廣八寸
上業廣尺二寸九丈十二初後譙一寸若月初生示不

敢自滿也 稗編 漢初馬少故曰自天子不能具純駟
將相或乘牛車言唯天子之車然後有馬然亦不能純
具一色至將相則時或駕牛也自吳楚誅後諸侯惟是
食租衣稅無有橫入故貧者或乘牛車則此之以牛而
駕自緣貧窶無資可具非有禁約也漢韋玄成以列侯
侍祠天雨淖不駕駟馬車而騎至廟下有司劾奏削爵
則舍車而騎漢已有禁矣東晉惟許乘車其或騎者御
史彈之則漢法仍在也至其駕車遂改用牛晉王導短

轅犢車犢牛犢也王濟之八百里駸駸亦牛也言其色
駸而行速日可行八百里也石崇之牛疾奔人不能追
此其所以獨異也南史吳興太守之官皆殺軹下牛以
祭項羽知駕車用牛也豈通三晉之制皆不得駕馬耶
羣書考索晉之賜王公則有雲母車三公有勲德者
有阜輪車而位至公者或四望或三望或夾望或油幢
車至後周諸侯則有輅或九方或碧或金或象或犀或
貝或草或篆或木之屬南史齊王子公侯舊乘纏帷

車蕭鸞獨乘下帷儀從如素士 北齊書後魏大臣老者多步挽車 唐車服志皇后之車六重翟車厭翟車翟車安車四望車金根車皇太子之車三金輅輅車四望車親王及武職一品有象輅青油纁朱裏通幃朱絲絡網二品三品有草輅朱裏青通幃四品有木輅五品有輅車皆碧裏青偏幃象飾朱班輪八鸞左建旂畫升龍右載闕戟草輅木輅左建旌輅車曲壁碧裏青通幃諸路朱質朱蓋朱旗朱班輪一品之旌九旒二品八旒

三品七旒四品六旒顰纓就亦如之三品以上珂九子
四品七子六品以下去通幟及珂王公車輅藏于太僕
受冊行冊命巡陵昏葬則給之餘皆以騎代車 山堂
肆考唐宣宗大中二年冬十一月萬壽公主適起居郎
鄭顥舊例公主下降以銀裝車帝曰吾欲以儉約化天
下當自親者始命依外命婦以銅裝車

名類 禮記鸞車有虞氏之路也鉤車夏后氏之路也
大路殷路乘路周路也注鸞車車有鸞和也鉤有曲與

者也曲輿謂曲前闌也輿謂車牀周禮巾車掌王之
五路一曰玉路錫樊纓十有再就建太常以祀金路鈎
樊纓九就建大旗以賓同姓以封象路朱樊纓七就建
大赤以朝異姓以封草路龍勒條纓五就建大白以即
戎以封四衛木路前樊鵠纓建大麾以田以封藩國注
王在焉曰路錫馬面當盧刻金為之樊讀如擊馬大帶
也纓在鈎膺婁領也以賓謂會賓客象路朱以朱飾勒
也龍勒龍駝也以白黑雜色飾勒也條讀為條以條絲

飾纓前讀為翦淺黑也鵠纓鵠色飾 晉書玉金象草
木是為五路並天子法車皆朱班漆輪畫為櫺文三十
輻法月之數重轂貳轄以赤油廣八寸長三尺注地繫
兩軸頭謂之飛鈴金薄繆龍繞之為輿倚較較重為文
獸伏軾龍首銜軛左右吉陽笏鸞雀立衡櫺文畫轅及
轡青蓋黃為裏謂之黃屋金華施櫺朱櫺二十八以象宿
兩箱之後皆玳瑁為鵬翅加以金銀雕飾故世人亦謂
之金鵬車斜注旂旗于車之左又加棨戟于車之右皆

橐而施之棨戟韜以黼黻上為弋字繫大蝦蟆幡輓長丈
餘於戟之杪以羗牛尾大如斗置左駢馬輓上是為左
蠹轅皆曲向上取禮緯山車垂句之義言不揉而能自
曲 晉書五路並以黃金為文髦插以翟尾象鹿而鏤

錫

當顧

金交而方釳樊纓赤罽易茸金就十有二皆有錫

鸞之飾和鈴之響鈎膺玉璫

馬帶玦名

龍輈

車轅頭為龍象

華轡

車衡

上朱幘法駕行則五路各有所主不俱出臨軒大會則陳

乘輿車輦于殿庭 唐車服志凡天子之車曰玉輅者

祭祀納后所乘也青質玉飾末金輅者饗射祀還飲至
所乘也赤質金飾末象輅者行道所乘也黃質象飾末
草輅者臨兵巡守所乘也白質輓以草木輅者蒐田所
乘也黑質漆之五輅皆重輿左青龍右白虎金鳳翅畫
芑文鳥獸黃屋左轟金鳳一鈴二在軾前鸞十二在衡
龍輶前設輶塵青蓋三層繡飾土設博山方鏡下圓鏡
樹羽輪金根朱班重牙左建旂十有二旒畫升龍其長
曳地青繡綢杠右載闔戟長四尺廣二尺黻文旂首金

龍銜錦結綬及綏帶垂鈴金鉸方釳插翟尾五焦鏤錫
顰纓十二就旌旗蓋顰纓皆從輅質唯蓋裏皆用黃
禮王后五路一重翟二厭翟三安車四翟車五輦車
周禮王后之五路重翟錫面朱總厭翟翟勒面續總安車
彫面顰總皆有容蓋鄭玄注重翟重翟雉之羽也厭翟
次其羽使相迫也勒面謂以如玉龍勒之韋為當面飾
也彫者畫龍以飾其韋安車坐乘車凡婦人車皆坐乘
故書朱總為續鄭司農云錫馬面錫續當為總書亦或

為總驚讀為鳬驚之驚驚總者青黑色以繒為之總著
馬勒直兩耳與兩鑣容謂檐車山東謂之裳幃或曰幢
容立謂朱總績總其施之如驚總車衡輶亦宜有焉績
畫文也蓋如今小車蓋也皆有容有益則重翟厭翟謂
蔽也重翟后從王祭祀所乘厭翟后從王賓饗諸侯所
乘安車無蔽后朝見于王所乘謂去飾也左傳大路
越席昭其儉也注大路王路天子之車越席結蒲越之
草為席也北史舊制五輅於轅上起箱天子與參乘

同箱內何稠曰君臣同所過為相逼乃廣為盤輿別擣
欄楯侍臣立于其中於內復起須彌平坐天子獨居其
上晉書輿服志五牛輅平吳後所造以建旗車設五
牛青赤在左黃在中白黑在右詞林海錯楚辭來吾
導夫先路先路車名郊特牲先路三就左傳鄭賜子展
先路子產次路元志玉輅用栲栳輪以上輅董巴輿
服志商瑞山車金根之色商人以為大輅於是秦始皇
作金根之車羣書考索秦平六國蕩滅典籍舊制多

亡改商瑞山車為金根車以金為飾謂之帝軫玄旗阜
游以從水德法水之數駕馬以六 宋書禮志秦閱三

代之車獨取殷制古曰桑根車秦曰金根車也漢氏因
秦之舊亦為乘輿所謂乘殷之輅者也 留青日札南

史齊志曰殷有瑞因乘鉤而制車因桑根而為色古所
謂器車也桑根車一曰金根車言桑色黃如金也漢儀
天子法駕曰金根車不學之子誤改為金銀車 徐廣

車服注天子金根車馬上插以翟毛皇后法駕乘重翟

羽蓋 魏文帝詔前于闕王山習所上孔雀尾萬枝文彩五色以為金根車蓋遙望耀人眼 晉書金根車駕四馬不建旗幟其上如畫輪車下猶金根之飾 魏收

後魏書金根車公主封君皆得乘之但右駢而已

以上金根

車

鹵簿令耕根車青質蓋三重餘同玉輅藉田則供

之 晉書耕根車駕四馬建赤旗十有二旒天子親耕所乘者也一名芝車一名三蓋車置耒耜於軾上 通典耕根漢制如副車有三蓋一曰芝車置車輻耒耜之

服晉駕四馬隋以青質羽葆雕裝軾青囊乘耜而加之

也

以上耕根車

晉書鸞旗車駕四先輅所載也鸞旗者謂

析羽毛而編之列繫於幢傍也輿服志鸞旗車亦曰

雞翹車通典鸞旗車漢制也繡鸞於旗插旗于上以

為前驅羣書考索漢制鸞旗車胡廣曰以銅作鸞鳥

於車衡上晉宋因之唐備之于大駕鹵簿

以上鸞旗車

通

典白鸞車隋制也一名鼓吹車上施層樓樓上有翔鸞

棲馬車柱之杪刻木為鸞以叩鸞毛筒唐時御史亦以

鷺羽飾車取鷺見水中魚能察隱微之義 通典皮軒

車漢制以虎皮為軒作前驅之車取曲禮前有士師則

載虎皮之義也 上林賦前皮軒後道游注文頴曰皮

軒以虎皮飾車天子出道車五乘游車九乘在乘輿車

前李善曰皮軒最居前而道游次皮軒之後 古今注

辟惡車秦制也車上有桃弓葦矢以禳不祥太史令一

人在車執弓箭 宋朝會要崇德車本秦辟惡車乾德

元年八月改令名中載皇旗太卜令在車執旗 宋朝

會要黃鉞車漢制唐貞觀後始加此車於鹵簿內鹵

簿令黃鉞車或曰金鉞車左武衛隊正一人在車次豹

尾車右武衛隊正一人在車皆武弁朱戈以上各色車逸

雅檻車上施欄檻以格猛獸之車也晉書獵車駕馬

馬天子校獵所乘也重輜輪繆龍繞之一名闌戟車一

名蹋豬車魏文帝改為蹋獸車古天子獵則乘木輅後人代以獵車羣

書考索獵車周禮謂之奇車曲禮曰國君不乘奇車注

云獵車也巾車氏木輅以田漢制一曰闌豬車親校獵

乘之魏改名闐虎車

以上獵車

漢書杜周傳賜安車馬四馬

師古注安車坐乘之車也後漢輿服志云公列侯安車

朱班輪倚鹿較伏熊軾阜蓋倚鹿較者畫立鹿于車之

前兩轡外也伏熊軾者車前橫軾為伏熊之形也車

服志安車者臨奉所乘也金飾重輿曲壁紫油纁朱裏

通幃朱絲絡網朱鞶纓朱履髮具絡駕赤駟副輅耕根

車安車皆八鸞晉書皇太子安車駕三左右駢朱班

輪倚獸較伏鹿軾九旒畫絳龍青蓋金華蚤二十八枚

黑檣文畫轡文輶黃金塗五綵亦謂之鸞輅 晉東宮

舊事皇太子初拜有石山安車一建九旗青色四馬

魏收後魏書安車紫蓋朱裏與公侯同子男卑蓋青裏

宋朝會要進賢古安車也乾德中元年八月改今名

通典進賢車周致仕之老及后乘之 逸雅安車蓋

卑坐乘今吏之乘小車也 晉書車坐乘者謂之安車

倚乘者謂之立車亦謂之高車按周禮唯王后有安車

也王亦無之自漢以來制乘輿乃有之有青立車青安

車赤立車赤安車黃立車黃安車白立車白安車黑立
車黑安車合十乘名為五時車俗謂之五帝車 留青
日扎漢有安車有立車安車可坐者也即步輦白虎通
曰制車以步故立乘孔子所以升車必正立蓋車廣六
尺四寸深四尺軾去輿高三尺三寸較去軾又高二尺
二寸共深高九尺五寸故仲尼長九尺餘亦可立也列
女傳立輜無駟是婦女亦立也 稗編安車輪不欲高
高則揺車身止長六尺可以臥其廣合轍輟以蒲索纏

之索如錢大車上設四柱蓋密簾為之紙糊黑漆廂高
尺四寸設茵韉車後為門前設扶板加于箱上在前可
凭在後可倚臨時移徙以鋏距子簪于兩廂之上板可
闊尺餘令可容書策及肴樽之類廂下以板鋪之臥則
可蔽風雨近後為窻戶以備側臥可觀山景車後施油
幃幃兩頭有軸雨則展之傳于前柱欲障風則半展或
偏展一邊臨時以鐵距子簪于車蓋梁及廂下無用則
卷之立於車後車前為納陛令可垂足而坐要臥則以

板架之令平

以上安車

釋名輅車輅遙也遠也四向遠望

之車也

漢書食貨志算輅車師古注輅小車也白

六帖劉歆等新定昏禮親迎立輅駟馬輅立乘小車也

駟馬儼駕也

晉書輅車古時軍車一馬曰輅車二馬

曰輅傳漢世貴輅駟而賤輅車晉魏重輅車而賤輅駟

三品將軍以上尚書令輅車黑耳有後戶僕射但有後

戶無耳並阜輪尚書及四品將軍則無後戶漆轂輪

晉公卿禮秩安平王孚薨葬給徘徊黑耳車一乘傳暢

故事曰尚書令輅車黑耳 通典鹿轡輅梁制三公開

府尚書令給之鳳轡輅尚書僕射中書監秘書監給之

耶泥輅尚書列卿等給之龍雀輅諸王除刺史帶將軍

給之方蓋輅中丞給之

以上輅車

逸雅輅車載輅重臥息

其中之車也輅廁也所載衣物雜廁其中也駟車駟屏

也四面屏蔽婦人所乘牛車也輅駟之形同有邸曰輅

無邸曰駟 周禮翟車貝面組總有握鄭玄注翟車不

重不厭以翟飾車之側爾貝面貝飾勒之當面也有握

則此無益矣如今輶車是也后所乘以出桑 張敞傳

君母出門則乘輶輶注輶輶衣車也 五代史王出入

閭里乘輶輶車 庶物異名疏輶靈輶車也左傳疏賈

逵云輶靈衣車也有輶有靈然則此車前後有蔽兩邊

開窻窻中堅木為靈今人猶名窻木為靈子齊侯執陽

虎載輶靈寢於其中而逃 東觀漢記梁冀僭侈作平

上輶車

以上輶輶

晉先蠶儀蠶將生擇吉日皇后乘油畫

雲母安車加六駝馬載筐鉤從蠶 袁子正書以雲母

飾犢車謂之雲母車臣下不得乘時以賜王公 晉書

謝玄敗苻堅于淝水獲所乘雲母車 晉太康起居注

齊王出鎮詔贈清油雲母犢車

以上雲母車

史記封禪爲

蒲輪車惡傷土石草木 漢書枚乘傳以安車蒲輪徵

乘師古注蒲輪以蒲裹輪 晉書卓輪車駕四牛形制

如犢車但皁漆輪轂上加青油幢朱絲繩絡諸王三公

有勲德者特加之 南史齊武帝給豫章王嶷皁輪車

晉書畫輪車駕牛以綵漆畫輪轂故名上起四夾杖

左右開四望綠油幢朱絲絡青交路其上形制事事如輦其下猶如犢車耳南史宋明帝賜建安王休仁漆輪車後漢輿服志皇子爲王錫青蓋車晉書王青蓋車皇孫綠蓋車並駕三左右駢晉書惠帝濟河張方率騎三千以陽燧青蓋車逢迎庶物異名疏字摩董卓車名卓乘金華青蓋車時人號字摩車言逼上也蔡邕以爲逾制卓改乘金華阜蓋車吳均續齊諧記漢宣帝以阜蓋車一乘賜大將軍霍光悉以金鉸具至

夜車轄上金鳳凰輒亡去莫知所之至曉乃還如此非
一後南郡黃君仲北山羅鳥得鳳凰入手即化成紫金
毛羽冠翅宛然具足可長尺餘詣闕上之帝置承露盤
上俄而飛去帝使尋之直入光家止車轄上乃知信然
帝取其車每遊行即乘御之晉書位至公或四望三
望夾望車油幢車駕牛形制如皐輪但不漆轂耳王公
大臣有勲德者特給之魏武帝與楊彪書今贈足下
畫輪四望通幃七香車二乘東宮舊事皇太子初拜

有畫輪四望車皇太子納妃四望車羽葆前後部鼓吹
各一部 羣書考索齊四望車通幃油幢絡班漆輪轂
亦曰阜輪車以加貴臣 宋朝會要明遠車古四望車
也駕以牛乾德元年八月改仍駕四馬制如屋上層四
面垂簾 晉陽秋魏舒子亡詔給陽燧四望車使出入
觀望散其哀懷 南史齊永明十一年給南郡王阜輪
三望車 事物原始高貴鄉公好士性急欲望外官特
給車一乘武賁五人每有宴集奔馳而至號曰追鋒車

晉書追鋒車去小平蓋如通幃如輅車駕二取其迅
速在戎陣為博乘 晉書天子詔宣帝鎮關中及次白
屋有詔召帝乃乘追鋒車自白屋四百餘里一宿而至
晉書大使車立乘駕四赤帷裳騶騎導從小使車不
立乘駕四輕車之流也蘭輿皆朱赤轂赤屏純白蓋赤
帷裳從騶騎四十人又別有小使車赤轂阜蓋追捕考
按有所執取者之所乘也凡諸使車皆阜班輪赤衡軛
漢宣帝紀太僕以軫輶車奉迎曾孫注文穎曰軫輶

小車前有曲輿不衣也李奇曰蘭輿輕車也師古曰時
未備天子車駕故且取其輕便耳逸雅容車婦人所
載小車也其蓋施帷所以隱蔽其形容也周禮注巾
猶衣也以衣飾車故曰巾車漢書陳遵傳乘藩車師
古注藩車車之有屏蔽者漢書衛后傳軒中得幸師
古注軒謂軒車即今車之羶幄者南史齊武帝賜豫
章王嶷以魏所送氎車續漢書輿服志大行載車其
飾如金根加施組組連壁交結四角金龍首銜壁垂五

采析羽流蘇 晉書通幔車駕牛猶如今犢車制但舉
其幔通覆車上也諸王三公並乘之 拾遺記周穆王
巡行天下馭黃金碧玉之車又副以瑤華之輪十乘
漢書武帝作畫雲車 隋大業雜記大駕羽衛有行漏
車鐘車鼓車 漢書劉屈氂傳載屈氂廚車以徇師古
注廚車載食之車 南史宋廣州刺史劉道錫餉庾仲
文白檀牽車裝飾甚嚴 沈約宋書沈慶之每朝賀常
乘豬鼻無憶車 左傳齊侯歸夫人魚軒杜注魚軒夫

人車以魚皮爲飾 漢書西域傳馮夫人名嫖漢宮人也善史書乘錦車持節和我而歸 北史齊後主市真珠爲穆后造七寶車 隋遺錄自都抵汴日進御女車車幃垂鮫綃網雜綴片玉鳴鈴行搖玲瓏以混車中笑語異左右不聞也 文懋昭金志后妃並用殿車其車如五花樓之狀上以錦繡青氍爲蓋四圍以簾秋冬亦用氍並用金飾緣柱廊月板護泥皆飾以金玉或四輪或二輪並朱車之四角后用金鳳妃用金孔雀如一品

二品車之四角夫人並用銀螭頭 陶宗儀元氏掖庭
記宮中制五雲車車有五箱以火樹爲檻式烏核爲輪
轅頂懸明珠左張翠羽蓋曳金鈴結青錦爲重雲覆頂
旁建青龍旗列磨鍔雕銀戟五右張白鳩緝毳蓋曳玉
鈴結素錦爲層雲覆頂旁建白虎旗列豹絨連珠槍五
前張紅猴毛羶蓋曳木鈴結赤錦爲重雲覆頂前建朱
雀旗列絳鋒火金戈五後張黑兔團毫蓋曳竹鈴結墨
錦爲層雲覆頂後建玄武旗列畫竿五中張彫羽曲柄

蓋曳石鈴結黃錦為層雲覆頂建勾陳旗中箱為帝座
外四箱為妃嬪座每晦夜遊幸苑中御此以行不用燈

燭

以上各
色車

黃帝內傳玄女為帝制司南車當其前記

里鼓車居其右 馬縞中華古今注指南車起於黃帝

與蚩尤戰於涿鹿之野蚩尤作大霧皆迷四方於是乃

作指南車以示四方遂擒蚩尤而即位故後漢恒建舊

記云周公所作也周公致治太平越裳氏重譯來獻白

雉一黑雉二象牙一使者迷其歸路周公錫以文錦二

足輶車五乘皆為司南之制使越裳氏載之以南緣扶
南林邑海際暮年而至其國使大夫宴將送至國而還
至始制車輶輶皆以鐵還至鐵亦銷盡以屬巾車氏攻
而載之常為先導示服遠人而正四方也車法在尚方
故事漢末喪亂其法中絕馬先生釣紹而作焉今指南
車馬先生之遺法也 典畧明帝使博士馬鈞作司南
車晉書司南車一名指南駕四馬其下制如樓三級
四角金龍銜羽葆刻木為僊人衣羽衣立車上車雖回

運而手常指南大駕出行爲先啓之乘 南史初宋武
平關中得姚興指南車有外形而無機杼每行使人於
內轉之昇明中齊高帝輔政使祖冲之改造銅機圓轉
不窮而司方如一 述征記尚方北門中有指南車車
上有木仙人持信幡車轉而人常指南 陳師道後山
叢談龍圖燕學士肅悟木理造指南車不成出見車馳
門動而得其法 事物紺珠指南車高一尺四寸二分
下長七寸四分轄木口員徑三寸七分管立木口員徑

三寸四分琢玉人手常指南足底通員竅作旋轉軸踏
虫尤之上 晉書記里鼓車駕四形制如司南其中有
木人執槌向鼓行一里則打一槌 晉輿服志記里鼓
車過江忘失制度而謝安率意造焉及獲京師舊輦形
制無差 古今筆記里鼓車一名大章車晉安帝時劉
裕滅秦得之 山堂肆考宋仁宗天聖五年內侍盧道
隆造鼓車其制獨轅雙輪廂上有兩層各安木人平執
木槌車行一里下一層木人擊鼓上平輪轉一周車行

十里上一層木人擊鐺朝野僉載則天如意中海州
進一匠造十二辰車迴轅正南則午門開馬頭人出四

方迴轉不爽毫釐

以上指南記
里時辰車

逸雅柏車柏伯也大

也丁夫服任之小車也墨車漆之正黑無文飾大夫所
乘也役車棧車皆庶人所乘也西京雜記漢朝輿駕
有象車鼓吹十三人前導晉輿服志象車漢鹵簿最
在前羣書考索大車牛車也牛車大則柏車中羊車
小矣大車以行澤柏車以行山羊車以行宮中關令

內傳尹喜常登樓望東極有紫氣西邁果見老君乘青
牛車來過 韻府薄板車即老子青牛車 北史隋五
品以上給犢車通幃三公親王加油絡 明皇雜錄上
將幸華清宮貴妃姊妹競飾車服各爲一犢車展以金
翠間以珠玉一車之費不啻數十萬既成甚重而牛不
能引 逸雅羊車羊祥也祥善也善飾之車今犢車是
也 晉書羊車一名輦車其上如輶伏兔箱漆畫輪輓
輿服志晉衛玠風神秀異乘羊車入市見者皆以爲

王人晉書武帝掖庭並寵者衆莫知所適乘羊車恣其所之宮人乃取竹葉插戶鹽汁洒地以引帝車南史潘淑妃以貌進始未見賞帝好乘羊車經諸房淑妃每裝飾褰帷以候并密令左右以醎水洒地帝每去戶羊輒舐地不去帝曰羊乃為汝徘徊況於人乎於是愛傾後宮文帝妃也隋禮儀志羊車小兒數人引之漢代或以人牽或駕果下馬梁貴賤通得乘之名曰牽子蜀志後主劉禪乘騾車降鄧艾合璧事類張楷公超家

貧無業嘗乘驢車至市賣藥足給而還又薊子訓嘗乘驢車左傳華路藍縷以啓山林注華路柴車風俗通鹿車柴車也窄小裁容一鹿故云漢冗散郎乘之

晉書劉伶常乘鹿車後漢書袁忠爲沛相乘輦車到

官以清亮稱晉書時湘土荒殘公私困弊司馬承躬

自儉約乘輦焚車詞林海錯笨車竹車也顏延之嘗

乘笨車徜徉自得又東漢李膺與郭林宗共乘薄笨車

上大槐板南史劉凝之與妻共乘蒲笨車出市貿易

以上各
色車

司馬法戎車夏曰鉤車商曰寅車周曰元戎

周禮車僕掌戎路之萃廣車之萃闕車之萃萃車之
萃輕車之萃鄭注萃猶副也此五者皆兵車所謂五戎
也戎路王在軍所乘 晉書戎車駕四馬天子親戎所
乘者也載金鼓羽旗幢翳置弩于軾上其建旄麾悉斜
注左傳晉厲公伐鄭楚子登巢車以望晉軍注兵車
高如巢可以望敵故楚共王登以望晉軍之動息 庶
物異名疏扶胥車之別名六韜曰大扶胥三十六乘材

士強弩矛戟爲翼一車二十四人推之以八尺車輪車
上立旗鼓兵法謂之震駭 孫吳兵法有巾有蓋謂之
武剛車武剛者爲先驅又爲屬車後爲殿馬 漢書衛
青伐匈奴以武剛車自環爲營 魏書太祖與袁紹戰
起土山射營中太祖乃爲發石車擊紹號霹靂車 事
物紺珠杷車上設伏機下引繩發之石飛遠擊又名李
公車孩兒把出交趾 晉書馬隆討羌依八陣圖作偏
廂車地廣爲鹿角車營路狹則爲木屋施於車上且戰

且前弓矢所及應弦而倒 車頰秦書苟萇圍襄陽作
飛雲車以攻城克之 南史宋劉劭西討築長圍創攻
道於東西并作大蝦蟆車載土牛皮蒙之三百人擁以
塞塹殷琰始降 後漢書輿服志輕車古之戰車也洞
朱輪輿不巾不蓋建矛戟幢麾輻輳弩服藏在武庫
中興係年錄紹興二年王彥恢制神武戰車下安四輪
略同飛虎頂張布帷以避矢石傍斜衝擊其用如神又
有拒馬車一人之力可以轉用比之蒙衝偏廂鹿角此

尤至要 韻府渠衝攻城車也 事物紺珠 衝輶車有
樓以撞城下城絞車立兩木橫施轉軸施十字木垂兩
繩下貫蹈板木牛車堅木厚板為平屋下四輪推攻城
輶輶下虛上蓋如斧四輪攻城颶塵車推車逼城颶塵
使城上難守虎車一輪虎口設鋒刃象車四輪象口設
鋒刃鎗車六輪前及兩傍設鎗巷戰車一輪短小
以上兵車
漢書季布傳置廣柳車中注服虔曰東郡謂廣轍車
為廣柳車鄭氏曰作大柳衣車若周禮喪車也李奇曰

廣柳大隆穹也晉灼曰周禮說衣袞柳柳聚也衆飾之所聚也此為載以喪車欲人不知師古曰晉鄭二說是也隆穹所謂車輦者耳非此之謂也霍光傳載光尸柩以輶輅車注文頴曰輶輅車如今喪輜車也孟康曰如衣車有窓牖閉之則溫開之則涼故名之輶輅車也臣瓚曰秦始皇道崩秘其事載以輶輅車百官奏事如故此不得是輜車類也案杜延年奏載霍光柩以輅車駕大厩白虎馬以輶車駕大厩白虎馬為倅師古曰輶

輅本安車也可以臥息後因載喪飾以柳霎故遂為喪車耳輶者密閉輅者旁開窓牖各別一乘隨車為名後人既專以載喪又去其一總為藩飾而合二名呼之耳

倅副也詞林海錯鯖車喪車也殯則謂之鯖車葬則

謂之柳車陸士衡詩注輿棺之車其蓋曰柳

以上喪車

黃帝岐伯經岐伯乘絳雲之車駕十二白鹿遊蓬萊之

上洞天經靈景道君乘赤雲車太洞玉經八皇老

君乘黃琅之車道經太真丈人登白鸞之車真誥

東海君乘獨颺飛輪車按行諸洞天 續稗海司馬紫

微狀類陶貞白天降車上有字曰賜司馬承禎承禎自

號白雲先生故人謂車為白雲車至文宗朝并張騫海

槎同取入內 藻林白鹿車青龍車白虎車皆升天車

也仙官薄延乘白鹿車司馬生乘青龍車徐福乘白虎

車共載升天 山堂肆考五雲車仙人所乘也

以上仙人車

附車類 諸葛亮集木牛者方腹曲頭一脚四足頭入

領中舌著於腹載多而行少宜可大用不可小使特行

者數十羣行二十里也 後山談叢蜀中有小車獨推
載八石前如牛頭又有大車用四人推載十石蓋木牛
流馬也 稗編蜀相諸葛亮之出征始造木牛流馬以
運餉蓋巴蜀道阻便於登陟故耳木牛即今小車之有
前轆者流馬即今獨推者是而民間謂之江州車子按
後漢郡國志巴蜀有江州縣疑亮始作之於江州縣故
後人以爲名也 元志俗有狗車木馬輕捷便利狗車
形似船以數十狗拽之往來遞運木馬形如彈弓擊足

激行可及奔馬二者可冰雪上行 博古圖鳩車狀鴈
鳩形置兩輪間輪行則鳩從之漢鳩車其禽背負一子
有鈕置之前以貫繩蓋繫維之所也六朝鳩車其禽前
後負二子亦有鈕以貫繩馬尾際又有小輪以助之蓋
制度相似但增損不同耳 張讓傳漢靈帝作番車渴
免省百姓洒道之費注番車設機車引水者渴免為曲
筒以氣引水上 庶物異名疏輶都胡中承乳之車元
世祖而下山陵各有輶都取馬乳以供祀事

輦

劉熙逸雅輦車人所輦也 物原夏禹制輦 羣書考
索夏氏末代制輦司馬法曰夏后氏二十人而輦商十
八人而輦周十五人而輦 原始通典曰夏后時謂之
輦周曰輜車許慎說文云挽車也漢書云駕人以行曰
輦秦始皇去其輪以人荷之謂人在前使引之也漢代
遂為人君之乘隋時亦稱輦 周禮輦車組輓有嬰羽
蓋鄭注輦車不言飾后居宮中從容所乘但漆之而已

通典王后輦車以羽作小蓋翳日 趙書皇后出蠶

乘羽蓋金華輦 東宮舊事皇太子有坐輦步輿 霍

光傳召皇太后御小馬車注張晏曰皇太后所駕遊宮

中輦車也漢廐有果下馬高三尺以駕輦 霍光傳霍

禹廣治第室作乘輿輦加畫繡網馮黃金塗韋絮薦輪

侍婢以五采絲輓顯遊戲第中注如淳曰網亦茵馮謂

所馮者也以黃金塗飾之師古曰茵緡也以繡為茵馮

而黃金塗輿輦也晉灼曰御輦以韋緣輪著之以絮師

古曰取其行安不搖動也 晉公卿禮秩太宰安平王
孚給雲母輦一乘 晉太康起居注齊王歸藩詔賜香
衣輦一乘 晉書桓玄造大輦容三十人坐以二百人
舁之 鄴中記石虎好遊獵體壯大不堪乘馬作獵輦
使二十人舁之如今之步輦上安排曲蓋坐處施轉關
若射鳥獸宜有所向開身而轉之 鄴中記石虎南郊
有金根輦雲母輦武剛輦數百乘虎皇后出乘高路輦
香衣輦或朱漆臥輦以純雲母代紗中外四望皆通徹

通典劉裕執慕容超獲金鈿輦南史車府令嘗以輦輦故請改易之又輦舊以烏皮緣故欲代以紫皮宋文帝以竹輦未至於壞紫色貴並不聽改南史梁改素輦名大同輦郊祀宗廟乘佩輦後魏書天樓輦輦十二加以玉飾衡輪乘輿輅用駕牛十二後魏書乾象輦羽葆圓蓋畫日月五星二十八宿大階雲漢山林雲氣神仙聖賢明忠孝節義游龍飛鳳朱雀玄武白虎青龍奇禽異獸可爲飾者皆辨圖焉皇太后祭郊廟則

乘之 羣書考索唐制輦有七一曰大鳳輦二曰大芳
輦三曰仙遊輦四曰小輕輦五曰芳亭輦六曰大玉輦
七曰小玉輦大駕鹵簿先玉輅以行 杜陽雜編咸通
中同昌公主乘七寶步輦四面綴五色香囊刻鏤水精
瑪瑙辟塵犀為龍鳳花其上仍絡以真珠玳瑁又金絲
為流蘇彫輕玉為浮動每一出遊則芬馥滿路晶熒照
灼觀者眩惑其目 清異錄蜀衍荒於遊幸乃造平底
大車下設四臥軸每軸安五輪凡二十輪牽以駿馬其

去如飛謂之流星輦 宋會要乾興元年禮儀院奉旨
製造皇太后御座檐子乞詳定制度所稱名目詔以大
安輦為名 事物紺珠 平輦又名平頭輦太平輦飾如
逍遙輦而無屋逍遙輦以機櫓為屋常行幸所乘皆宋
制 庶物異名疏 服連見管子蓋輦名所以載作器人
挽之 拾遺記周穆王馭黃金碧玉之輦從朝及暮而
窮宇宙之內焉又穆王東巡西王母乘翠鳳之輦而來
漢武內傳王母乘紫雲之輦駕九色班龍 真人王

君內傳清虛真人入陽谷山忽見天尊貴神乘三雲之輦駕九龍之輿靈寶五符序北方有夜光玉女服雲林之翠羅駕鹿輦於天河

輿附輶

羣書考索天子之輦凡三曰五色輿曰常平輿曰腰輿孔氏雜說今之肩輿是以人代畜也決疑要錄腰輿以手挽別於肩輿大饗明堂記十二神輿載十二月之神象通典按小輿今犢車駟車之流宋制小輿

形如輶車小行幸則乘之 閑居賦注板輿一名步輿
周遷輿服雜事步輿方四尺素木為之以皮為攢
之自天子至庶人通得乘之 王楙野客叢談世率以
板輿爲奉母親事用如樂天詩朱旛四從板輿行取潘
安仁閑居賦太夫人乃御板輿之意不知當時三公告
老亦許以板輿上殿如傅祗者是則板輿事不可專爲
奉母也梁韋睿以板輿自載督厲衆軍則知板輿不止
一事 物原 漢高祖作竹兜 張耳傳貫高以篋輿前

何休公羊傳注荀者竹筏一名編輿 雞肋編廣南
里俗呼竹輿爲逍遙子 葛玄傳五帝真人並乘八景
玉輿 上清訣玄母乘三素之輿 晉書桓玄體大不
堪乘馬作徘徊輿施轉關令迴動無滯 晉書陶潛有
脚疾使一門生二兒輦籃輿 南史宋貶讓諸侯王條
格輿不得重輶 演繁露杜詩夫人常肩輿上殿稱萬
壽按唐會要命婦朝謁並不得乘擔子其尊屬年高特
敕賜擔子者不在此例王珪母殆得特恩歟 天寶遺

事申王每醉即使宮妓將錦繡結一兜子令宮妓輦擡
昇歸寢室本宮呼曰醉興 唐書吐蕃寇西山嚴武遣
崔寧將而西既克蕃而還武大悅裝七寶輿迎入以誇
於軍 研北雜志故宋宮人出入著前兵士呵唱車馬
者蓋在京時乘坐車故也渡江後用肩輿此聲尚存何
耶 稗編舊唐書輿服志曰開成末定制宰相三公諸
司官及致仕官疾病官許乘擔子如漢魏載輿之制按
唐乾元以來始用兜籠代車輿疑此為擔子之制也亦

漢魏載輿步輿之遺事云然則今之大臣朝廷所崇敬而老疾則賜以肩輿蓋倣開成之制也兜子巴蜀婦人所用乾元以來蕃將多著勲於朝兜籠易於擔負京師始用兜籠代車輿矣兜籠即今之兜子蓋其制起於巴蜀而用於中朝自唐乾元以來也

輜 物原秦始皇作輜 漢書嚴助傳輿輜而隃領注臣瓚曰今竹輿車江表作竹輿以行是也項昭曰輜旗廟反領山領也不通船車運轉皆擔輿也師古曰此直

言以轎過領耳 演繁露古有車車以轅繫馬而行已而有輦輦者設杠以人肩之故皇甫謐曰桀為無道以人駕車是步輦之始也既有輦則以竹為輿智起於是矣淮南王安曰輿輦而入領始名輦也 演繁露百官

得於寓京乘輦自揚州始後遂不復乘馬惟從駕則乘之祖宗時臣僚雖在外亦不許乘輦也唐會要曰開成五年黎植奏朝官出使自合乘驛馬不合更乘擔子自此請不限高卑不得輒乘擔子如疾病即任所在陳牒

申中書門下及御史臺其擔夫自出錢雇其宰相至僕射致仕官疾病者許乘之 山家清事夏禹山行乘橈漢南粵王與轎過領洪景廬謂山行之車只可平地而行孰若今轎爲便橈即轎無疑矣若山轎則無如今廬山建昌高下輪轉之制或施以青罩用肩扳棕繩低輿之今貴介郊行者甚便遊賞 稗編古稱肩輿腰輿版輿兒子即今轎也洪武永樂間大臣無乘轎者觀兩京諸司儀門外各有上馬臺可知矣或云乘轎始於宣德

成化間始有禁例文職三品以上得乘四品以下乘馬
宋儒謂乘輜以人代畜於理不宜固是正論然南中亦
有無驢馬顧騎處縱有之山嶺陡峻局促處非馬驢所
能行兩人肩一輜便捷之甚此又當從民便不可執一
論也 留青曰扎漢有安車有立車安車可坐者也即
步輦今之四輜八輜其濫觴也 事物原始筭今車上
及輜上之竹簾用以障面塵者俗呼為輜簾始于周時

附馬具

鐙

鞭

鞵

障泥

總論 魏了翁讀書雜鈔左傳主人焚衝或濡馬褐以救之注衝車也褐馬衣按此古者馬有衣 漢書百官表爵三簪褭注以組帶馬曰褭簪褭者言飾此馬也

南史時朝廷器甲皆充南討蕭道成軍容寡闕乃編椶皮爲馬具裝 南史齊武帝子廬陵王子卿作瑋瑁乘具詔責之 南史齊後主馬乘具用錦繡處患爲雨所濕織雜采珠爲覆蒙備諸雕巧 稗編馬胸前以韋爲蔽曰馬當胸繫腹帶曰鏤膺甲馬曰介馬馬額鏡曰月

題 蔡邕獨斷金鍍高廣各四寸在馬鬣前 山堂肆

考金匱匣馬絡頭也又駝背以錦帕蒙之謂之錦縹糊

毛詩指南圖餞者馬之甲鑠金以為其札也 事物

紺珠搭後馬後甲雞項馬項甲盪胸馬胸甲 詞林海

錯荀子蛟韞注馬服之革蓋以蛟皮為之韞音絢左傳韞

鞞鞞在背曰韞在胃曰鞞詩陰鞞鞞續注靳環靳者

言其常處游左驂馬背上左傳如驂之有靳在腹曰鞞

今之袞肚在後曰鞞

轡 釋名轡拂也言牽引拂戾以制馬也 初學記轡

之爲飾有銜勒鑣羈韁鞚之類以成其用也銜在口中
之言也勒絡也絡其頭而引之鑣包也在旁包歛其口
也羈撿也所以持制之也韁羈也繫之使不得出羈限
也韁亦曰勒故埤蒼曰勒馬韁也鞚取控制之義通俗
文云所以制馬曰鞚 西京雜記 武帝時身毒國獻瑪
瑙勒以瑪瑙石爲之 庶物異名疏鑣者銜兩旁之鐵
今之排沫是也一作扇汗 卓氏藻林莊子羈馬即馬

籠絡也羈以絡馬之頭鬣以糾其足也今所謂前鞵後鞵
山堂肆考鞵在口曰鞵絡在頭曰羈 西京雜記
武帝時身毒國獻連環羈皆以白玉作之

鞍 說文鞍馬鞍具也 鹽鐵論古者庶人賤騎繩控

草鞵皮薦而已及其後草鞍釐成鐵鑣不飾今富者鞵
耳銀鑷黃金琅勒罽繡弇汙垂珥胡鮮 西京雜記武
帝時身毒國獻白光琉璃鞍鞍在暗室中常照十餘丈
如晝日自是長安始盛飾鞍馬競加雕鏤或一馬之飾

直百金皆以南海白蜃為珂紫金爲華以飾其上猶以
不鳴爲患或加以鈴鑼飾以流蘇走則如撞鐘磬若飛
幡葆 西京雜記漢武得貳師天馬造玫瑰石爲鞍鏤
以金銀鍮石 三輔決錄平陵公孫奮富聞京師梁冀
知奮儉恡以鏤衢鞍遺奮從貸五十萬 中華古今注
孫文臺獲青玉馬鞍其光照於衢路 永昌記文帝秦
王金銀鞍加翠毛之飾 劉義恭謝金梁鞍啓賜臣供
御金梁橋鞍制作精巧宜副龍駟聖慈下逮猥垂光錫

初學記魏百官各有紫茸題頭高橋鞍一具 天寶

遺事明皇在蜀以七寶鞍賜張后 天寶遺事寧王有

煖玉鞍每至冬月則用之雖天氣嚴寒而坐於鞍上如

溫火之氣 北夢瑣言蜀朝許承傑爲都頭軍僭越奢

大騎碧煖座碧煖座者即煖馬鞍也 清異錄劉鋹自

結珠龍九五鞍獻闕下 解醒語西僧楊璉真伽發宋

高宗陵得真珠戲馬鞍乃嶺南劉鋹所結以獻太祖者

錦繡萬花谷學士新入院飛龍廐賜馬一匹銀鬃妝

鞍轡 宋燕翼貽謀錄鞍轡之別亦始於太宗時太平
興國七年正月詔常參官銀裝鞍絲條六品以下不得
開裝仍不得用刺繡金皮飾韉末仕者烏漆素鞍則是
一命以上皆可以銀裝鞍也近歲惟郡太守猶存銀裝
絲條之制此外無敢用者若烏漆則庶人通用而鞍皮
之巧無所不至其用素鞍者鮮矣孔平仲談苑禁中
近清明節神宗侍曹太皇因語自來卻無人做珠子鞍
轡雖云太華然亦好也太皇聞此語已密令人描樣矣

不數日促就珠子鞍轡其上作小紅羅銷金坐子方可容體送神宗神宗大感悅取小烏馬於福寧殿親試之長編初馬軍用大鞍不便野戰熙寧六年上始以邊樣皮鞵小鞍用木鞍長韁回旋轉射得盡馳驟之技丹鉛錄鍍音減以鏤金飾馬首又鐵質金文曰鍍今名馬鞍曰鍍銀事件當用此鍍字或作鍍非

韉 晉張方傳軍亂入宮割流蘇武帳以爲馬幟

與韉同

五行志中宗朝安樂公主令上方以百獸毛爲韉回

視之各見本獸形也 事物紺珠 韋后集鳥毛爲羈皆具其鳥獸狀工費巨萬

障泥 西京雜記武帝時得貳師天馬以綠地五色錦爲蔽泥後梢以熊羆皮爲之熊羆毛有綠光皆長二尺者直百金 魏百官名黃地金縷織成萬歲障泥一具世說王武子常乘一馬著連乾障泥前有水馬不肯渡王云此必是惜障泥使人解去馬乃渡 升菴外集文鴛與石虎戰敗解馬羅披自障馬羅披即障泥也

北史長孫道生拜司空性廉約衣不華飾食不蕪味一
熊皮障泥數十年不易真珠船障泥一名障汙一名
弇汙一名蔽泥韓及治王睦病死以豹皮馬障泥臥上
立愈

鐙 宋志百官鞞勒有陷銀銜鐙 廣韻縹玉帖鐙馬
具也世說謝萬在壽春奔走猶求玉帖鐙 方書馬鐙
治野田燐火或火光出沒用馬鐙相戛作聲即滅故張
華云金葉一振遊光斂色注金葉馬鐙也

鞭 初學記鞭策箠皆馬撾之名說文所謂驅遲者也

古者用草以驅馬故其文從草其後以竹代草故策箠
二文又並從竹蓋因驅策箠擊之義以立名也 蕭方

等三十國春秋王敦謀害王澄而澄衆有二十人持鐵

馬鞭為衛 世說王敦在姑熟晉明帝出看敦覺追帝

帝以金馬鞭與客姥追者問姥姥云去已久矣 涼州

記咸寧二年發張駿陵得鞭飾以珊瑚 杜陽編天寶

中興國獻軟玉鞭屈之則首尾相就舒之則勁直如繩

杜陽編貞元三年中常侍自蜀使迴進瑞鞭一其文
節高有麟鳳龜龍之形體質微而鱗甲毛羽無不備具
其色照爛有類琥珀於暗中揮之有如電光 致虛閣
雜俎宣宗時西域國人獻馬見愁皮帝賜羣臣編為馬
鞭一揚即走謂之不須鞭 太平廣記黥木節以蟲獸
可以為鞭 朝野僉載被馬咬者燒鞭稍灰塗之

格致鏡原卷二十九